



ICYEMEZO CYA KOMITE NDANGAMYITWARIRE YA RWANDA MEDIA COMMISSION (RMC) KU KIREGO CY'IMPUZAMIRYANGO PRO-FEMMES TWESÉ HAMWE IREGA RADIO AMAZING GRACE CHRISTIAN RADIO N'UMUVUGABUTUMWA NICOLAS NIYIBIKORA

UREGA: Impuzamiryango Pro-Femmes Twese Hamwe

UREGWA: Amazing Grace Christian Radio n'umuvugabutumwa Nicolas NIYIBIKORA

IKIREGERWA: Gutambusa inyigisho zihembera urwango rushingiye ku gitsina kwibasira no gusebya abagore

URWEGO RWAREGEWE: Rwanda Media Commission (RMC)

I. UKO IKIBAZO GITEYE MURI MAKE

- [1] Tariki 29 Mutarama 2018, nyuma ya saa mbiri z'ijoro kuri Radio Ubuntu Butangaje (Amazing Grace Christian Radio) hatambutse ikiganiro cyiswe Ubwiru cyakozwe n'umuvugabutumwa witwa Pasiteri Nicolas NIYIBIKORA.
- [2] Tariki 6 Gashyantare 2018, RMC yakiriye ikirego cya Profemmes TWESÉ HAMWE irega Amazing Grace Christian Radio ko yatambukije inyigisho zihembera urwango rushingiye ku gitsina ndetse ibyakozwe binanyuranya na politiki y'igihugu yo kwimakaza ihame ry'uburinganire n'uburenganzira bwa munetu aho ngo mu kiganiro humvikanyemo amagambo yibasira umugore, akamubeshyera, akamusebya akanamwandagaza. Ikirego cya Pro-Femmes Twese Hamwe cyasabaga ko Amazing Grace Christian Radio na Pasiteri Nicolas NIYIBIKORA bahabwa ibihano n'Urwego rw'Abanyamakuru Bigenzura ndetse bakanategekwe kunyomoza ibyo bavuze basaba imbabazi Abanyarwanda muri rusange n'abagore by'umwiheriko.
- [3] RMC yasesengiye ikiganiro cyatambukije yifashishije amajwi yafashwe n'ibyuma byagenewe gukurikirana ibinyura mu bitangazamakuru bikoresha amajwi, n'ibikoresha amajwi n'amashusho bitambutswa mu Rwanda.
- [4] Nyuma yo kwakira ikirego cya Pro-Femmes Twese hamwe, RMC yagennye Komite Ndangamyitwarire igizwe na ba Komiseri KAGIRE Edmund, Komiseri

ek vs



UWIMANA Jean-Pierre na Komiseri UWINEZA Liliane maze kuwa 12 Gashyantare 2018 itumiza impande zose ngo zitange ibisobanuro hanafatwe umwanzuro ushingiye ku biteganywa n'amahame ngengamyitwarire y'umwuga w'Itangazamakuru mu Rwanda.

II. IBISOBANURO BY'IMPANDE ZOMBI

- [5] Ku gicamunsi cyo kuwa 12 Gashyantare 2018 Komite Ndangamyitwarire yateraniye ku cyicaro cya RMC ngo yumve impande zombi. Kuri uwo munsi, Komite yasuzumye niba impande zose zitabye maze isanga ku ruhande rw'urega hitabye abayobozi batandukanye b'impuzamiryango Pro-Femmes TWESE HAMWE bayobowe n'umuyobozi wayo, Madame KANAKUZE Jeanne d'Arc. Ku ruhande rw'abaregwaa hari hitabye abayobozi n'abakozi ba Radio Amazing Grace Christian Radio bayobowe n'umuyobozi wayo Gregg Schoof. Umuvugabutumwa Nicolas NIYIBIKORA we ntabwo yitabye ariko ngo bari bamumenyesheje ubutumire.
- [6] Komite yasobanuriye impande zombi uko RMC yakiriye ikirego n'uko kiza gusuzumwa, maze inavuga ko nyuma yo gutumira impande zombi yanakiriye ikindi kirego cyatanzwe n'ishyirahamwe ry'Abagore bakora Itangazamakuru mu Rwanda nacyo kirega ikiganiro cyatambukijwe na Amazing Grace kuwa 29 Gashyantare 2018. Komite yavuze ko itaza kwinjira mu mizi y'ikirego cya ARFEM kubera ko mu butumire abaregwaa batakimenyeshejwe, ivuga ko ibiregwaa n'ubundi bijya gusa n'ibyo Pro-Femmes Twese hamwe yareze.
- [7] Komite Ndangamyitwarire yahaye umwanya Pro-Femmes Twese hamwe ngo isobanure ikirego cyayo maze umuyobozi wayo Madame Kanakuze Jeanne d'Arc avuga ko ikirego cya Pro-Femmes Twese Hamwe cyatanzwe mu izina ry'impuzamiryango, abagenerwabikorwa bayo, abavandimwe n'inshuti zayo. Yavuze ko bafashe icyemezo cyo kugeza kuri RMC ikirego kubera ikiganiro cyatambukijwe na NIYIBIKORA Nicolas kuwa 29 Mutarama 2018. Yavuze ko ikiganiro cyatambukijwe kuri uwo munsi basanga ari rutwitsi gikubiyemo ibantu bipfobya ikiremwa muntu ariko byagera ku mugore bikaba ibindi bindi. Ngo Ni inyigisho ya rutwitsi, ihamagarira abantu kwangana no kwicana, irabeshya, irasebanya kandi ntabwo ari ukuri kuko ngo yambura umugore agaciro, ko umugore ari umuntu udashobotse, udakwiye guhabwa agaciro. Ngo basesenguye icyo kiganiro bumva ari agahomamunwa, bumva batabiyihanganira kuko bumva byanabasubiza mu bihe nk'ibya Jenoside yakorewe Abatutsi. KANAKUZE yavuze ko basaba ko RMC yasuzuma ikirego ikagena igikwiye, igahana radio mu nyungu z'abanyagihugu. Yakomeje avuga ko bibaza niba ibyatambukijwe na Amazing Grace ari cyo gihembo kigenewe abagore nk'abana b'abanyarwanda.

- [8] Komite yanahaye ijambo umunyamategeko wa Pro-Femme Twese Hamwe ngo yunganire KANAKUZE maze avuga ko muri make ikirego batanze kirimo ibice bitatu: Icy a mbere ngo ibyatangajwe babibonamo iho hotera rishingiye ku gitsina, icy a kabiri ngo ni uguharabika no busebanya aho umugore ngo yitiriwe ibikorwa bibi bishobora kumutesha agaciro no kumusuzuguza, icy a gagatu ni uguteza imidugararo mu banyarwanda.
- [9] Komite yasabye impande zombi gutega amatwi igice cy'ikiganiro cyatambutse kuri radio Amazing Grace maze humvikanamo zimwe mu mvugo zikurikira:
- *Reka nze mbabwire umugore uko agaragara imbere y'Imana. Icy a mbere afitanye ikibazo n'Imana. Mwumve rero ikibazo cy'umugore guhera mu itangiriro kugera mu byahishuwe.....*
 - *wicare uzi ngo Imana ifitanye ikibazo n'umugore, ifitanye ikibazo n'abagore,niba utari unabizi ubimenye;*
 - *Umugore! Mwebwe muramwitiranya. Umugore ni mubi! Noneho mbivuge. Umugore ni mubi adindiza gahunda z'Uwiteka ;*
 - *Kuki se bitakozwe n'umugabo? Wagiye wumva neza ububi bw'umugore!;*
 - *Kuki umugore yagiye abangama muri gahunda nyinshi cyane uhereye mu itangiriro.*
 - *Umugore ko tubona afite ibikorwa bibi, uratekereza ngo si amarenga y'ibintu by'ubwire abantu bakiyi kumenya bagasobnukirwa? Umugore ni mubi;*
 - *Umvu umugore! Umugore! Umwicanyi mubi!*
 - *Umugore wowe uramukinisha!*
- [10] Nyuma yo kumva ikiganiro, Komite yahaye umwanya uruhande rw'abaregwa ngo narwo rwisobanure. Gregg Schoof yavuze ko basaba imbabazi kubera ibyo yumvishe Nicolas NIYIBIKORA yatangaje ngo kuko ari indengakamere. Gregg Schoof yavuze ko atabashije kumva ibyatangajwe byose kuko ngo yasabye abakozi be kumuhindurira mu Cyongereza ibyavuzwe na NIYIBIKORA kugeza ubwo yitabaga akaba yari amaze kumva ½ ariko ngo kugeza ku byo amaze kumva nta kintu kizima yari yabonamo ngo byose ni bibi. Yavuze ko NIYIBIKORA yashatse kugereranya Itorero n'umugore ariko ngo ni ibintu bidakoreka. Yavuze ko ubundi abakirisitu bazima bazamura umugore.
- [11] Komite yabajije Gregg Schoof niba Radio ye ifite umukozi ugenzura ibiganiro bihitishwaho maze avuga ko muri iyi minsi ntawe yari afite, byose ari we ubyikorera ariko ngo ntabwo yumva Ikinyarwanda.

- [12] Komite yabajije niba Nicolas NIYIBIKORA asanzwe ari umunyamakuru wa Amazing Grace maze basubiza ko ari umuvugabutumwa usanzwe wagiranye amasezerano na Amazing Grace yo kubwiriza kuri Radio binyuze mu itsinda ryitwa Kwihana no kubabarirwa ibyaha. Komite yabajije niba iri tsinda rizwi rifite aho ryanditse mu mategeko y'u Rwanda, maze basubiza ko ntaho, nta buzima gatozi rifite.
- [13] Uruhande rwa Amazing Grace Christian Radio rwavuze kandi ko nyuma y'aho ikiganiro cyarezwe gitambukiye, Pasiteri NIYIBIKORA yasubiye kuri Radio agasobanura ibyo yavuze akanasaba imbabazi ariko uruhande rwa Pro-Femmes ruvuga ko ntabyo bigeze bumva na rimwe.
- [14] Komite Ndangamyitwarire yasomye ibiteganywa n'ingingo ya 4, iya 2 n'iya 3 mu mahame ngengamyitwarire y'umwuga w'Itangazamakuru mu Rwanda igenda isobanurira abaregwa icyari kuba cyarakozwe ngo hatagira umuntu uhutazwa. Gregg Schoof yavuze ko byose byatewe n'isanganya yagize zo kubura umukozi ushinzwe ibiganiro ariko asaba imbabazi kubera ko ari ubwa mbere bibayeho. Komite yamubwiye ko atari ubwa mbere kubera ko hari ibindi birego Amazing Grace Radio yagiye iregwamo kubera gutambutsa ibiganiro birimo gukurura urwango rushingiye ku idini ndetse yerekwa n'ibaruwa aheruka kwandikirwa ihagarika ikiganiro Bibiliya na korowani. Gregg Schoof yabajije niba aramutse asabye imbabazi hari icyo byafasha, Komite ivuga ko biza gusuzumwa mu mwanya wo gufata umwanzuro.
- [15] Nyuma y'ibisobanuro birambuye n'impaka ku byabaye, Komite yasabye kwiherera ngo isuzume ibisobanuro byatanzwe maze ifata umwanzuro.

III. UMWANZURO WA KOMITE NDANGAMYITWARIRE

- [16] Komite Ndangamyitwarire ya Rwanda Media Commission;
- [17] Imaze kumva ibisobanuro by'impande zose ku kirego cyatanzwe n'Impuzamiryango Pro-Femmes Twese Hamwe iregamo Amazing Grace Christian Radio ivugira kuri 105.1 FM kubera ikiganiro cyatambutse tariki ya 29 Mutarama 2018 gikozwe na Bwana Nicolas NIYIBIKORA
- [18] Imaze kumva no gusesengura ikiganiro cyatambukije na Amazing Grace Christian Radio, 105.1 FM tariki ya 29 Mutarama 2018 ku mugoroba;
- [19] Komite Ndangamyitwarire ishingiye ku biteganywa n'Ingingo ya 30 y'amahame ngengamyitwarire y'umwuga w'Itangazamakuru mu Rwanda igira iti: "Ibirego byerekeye iyubahirizwa ry'indangamyitwarire: Umuntu wese, yemerewe gusaba komite ngengamyitwarire gusuzuma ukurengera k'umunyamakuru n'igitangazamakuru hagendewe ku mahame ngengamyitwarire hagafatwa umwanzuro kuri iki kirego. Kujuririra ibi



byemezo nabyo biremewe.”; yemeye kwakira no gusuzuma ikirego cyatanzwe n’Impuzamiryango Pro-Femmes Twese Hamwe;

- [20] Ishingiye ku biteganywa n’Ingingo ya 31 y’Amahame Ngengamyitwarire igira iti: “Uburenganzira bwo kwisobanura: Umunyamakuru n’igitangazamakuru bakurikiranweho kutubahiriza aya mahame bagomba guhabwa umwanya wo kwisobanura imbere ya komisiyo mbere y’uko bafatirwa ibihano...” yatumije none kuwa 12 Gashyantare 2018 impande zose zirebwa n’ikirego kiregwamo Amazing Grace Christian Radio kubera ikiganiro cyatambutse tariki ya 29 Mutarama 2018 gikozwe na Bwana Nicolas NIYIBIKORA kuko cyarezwe;
- [21] Komite Ndangamyitwarire ya RMC ishingiye ku biteganywa n’Ingingo ya Mbere y’Amahame Ngengamyitwarire y’umwuga w’itangazamakuru mu Rwanda igira iti: “Guharanira indangagaciro mpuzamahanga: Umunyamakuru agomba guharanira indangagaciro mpuzamahanga z’amahoro, ubworoherane, demokarasi, uburenganzira bwa muntu, iterambere rishingiye ku mibereho myiza y’abaturage n’ubusabane bw’abanyagihugu buha agaciro buri muturage, nk’uko biteganywa mu Itangazo Mpuzamahanga ku burenganzira bwa Muntu.”
- [22] Komite Ndangamyitwarire ya RMC ishingiye ku biteganywa n’ingingo ya 2 y’amahame ngengamyitwarire y’umwuga w’itangazamakuru mu Rwanda igira iti: “Ubunyangamugayo no guharanira ukuri: Umunyamakuru yirinda ibinyoma. Afite inshingano yo gutangaza uko ibintu byagenze, agashakisha ukuri, kandi azirikana ko rubanda rufite uburenganzira bwo guhabwa amakuru y’impamo. Ntakwiye kwirengagiza amakuru y’ingenzi cyangwa ngo ahindure amagambo yavuzwe cyangwa inyandiko izo arizo zose. Agomba kumenya ko guharabika, gutukana, gusebanya no gushinja ibinyoma yaba abantu, amatsinda, amasosiyete y’ubucuruzi, amashyirahamiwe, imiryango cyangwa ibihugu ari amakosa akomeye y’umwuga.”;
- [23] Komite ishingiye no ku ngingo ya 3 y’aya mahame igira iti: “Inshingano kuri rubanda: Umunyamakuru agomba kuzirikana inshingano ye kuri rubanda. Kubera iyo mpamvu, agomba gutangaza cyangwa kwandika amakuru ari uko yamenye aho yaturutse, ko ari ukuri kandi yuzuye. Igihe harimo ugushidikanya na guke agomba kureka kuyatangaza cyangwa akigengesera akurikije uburyo buteganywa n’umwuga w’itangazamakuru.”;
- [24] Komite Ndangamyitwarire ya RMC ishingiye kandi ku bitaganywa n’ingingo ya 4 y’Amahame ngengamyitwarire y’umwuga w’Itangazamakuru mu Rwanda igira iti: “Kubiba urwango: Umunyamakuru yirinda gutangaza cyangwa kwandika amakuru abogamye cyangwa abiba urwango rushingiye ku ibara ry’uruju, ku miryango, ku moko, ku idini, ku gitsina, ku myaka y’ubukure, ku mibereho, ku bumuga, ku indwara z’ibyorezo, cyangwa indi



mimerere y'ubuzima n'ibindi bishobora gushingirwaho mu kuvangura abantu...”;

- [25] Isanze ibyakozwe na NIYIBIKORA Nicolas na Amazing Grace Christian Radio ari amakosa akomeye y'umwuga kuko harimo kubeshya abanyarwanda, gusebanya no guhembera urwango rushingiye ku gitsina n'idini;
- [26] Komite Ndangamyitwarire ya Rwanda Media Commission ishingiye ku bubasha ihabwa n'Itegeko N° 02/2013 ryo kuwa 08/02/2013 rigenga itangazamakuru mu Rwanda cyane cyane mu ngingo ya 4 igira iti: “*Imikorere y'itangazamakuru n'imyitwarire y'abanyamakuru umunsi ku wundi bigenzurwa n'Urwego rw'Abanyamakuru Bigenzura;*”
- [27] Komite Ndangamyitwarire imaze kumva ko Nicolas NIYIBIKORA yasabye imbabazi ariko bikumvikana nko kwisobanura, itegetse Bwana NIYIBIKORA Nicolas gusaba imbabazi mu nyandiko Abanyarwanda bose muri rusange ko babeshwe n'abari n'abategarugori by'umwiheriko kubera ko bandagajwe n'imvugo yatangaje ku itariki ya 29 Mutarama 2018 ubwo yari ari mu kiganiro kuri Amazing Grace Christian Radio. Inyandiko isaba imbabazi igomba kuba yagejwe kuri Rwanda Media Commission mu gihe kitarenze amasaha 48 uhoreye none ngo imenyeshwe Abanyarwanda bose muri Rusange;
- [28] Komite Ndangamyitwarire ya Rwanda Media Commission ihereye ku myanzuro ya RMC yo kuwa 15 Mata 2014 ku kirego giturutse mu Baturage RMC yari yashyikirijwe na RURA aho ikiganiro Bibiliya na Qur'an cyanyuraga kuri Radio Amazing Grace cyagaragayeho guhembera amacakubiri ashingiye ku madini igasabwa kubahiriza amahame y'umwuga w'Itangazamakuru;
- [29] Komite Ndangamyitwarire ishingiye kandi ku mwanzuro wa Komite Ndangamyitwarire ya RMC wo kuwa 28 Werurwe 2016 ku kirego cya Mufti w'u Rwanda arega Amazing Grace Radio kwibasira idini ya Islam mu kiganiro Bibiliya na Qur'an cyari cyarongeye gutambutswa hirengagijwe umwanzuro wa RMC icyo kiganiro kikongera kugaragaramo imvugo zisebya andi madini no kubangamira uburenganzira bw'abantu ku bwisanzure mu mitekerereze n'imyemerere yabo;
- [30] Komite Ndangamyitwarire ishingiye ku ibaruwa ihagarika ikiganiro rutwitsi Bibiliya na Qur'an yo kuwa 7 Ukuboza 2017 ndetse Radio Amazing Grace ikaza no gusabwa kwigengesera mu biganiro byayo no kubahiriza Amahame agenga itangazamakuru mu Rwanda;
- [31] Komite Ndangamyitwarire ya RMC ishingiye ku biteganywa n'Ingingo ya 29 mu mahame Ngengamyitwarire y'umwuga w'Itangazamakuru mu Rwanda, itegetse Amazing Grace Christian Radio gusaba imbabazi mu nyandiko Abanyarwanda bose muri rusange n'abagore by'umwiheriko

kubera amakosa y'umwuga yabayeho, inyandiko isaba imbabazi igashyikirizwa RMC mu gihe kitarenze amasaha 48 uhereye none.

- [32] Komite Ndangamyitwarire ishingiye ku kuba Amazing Grace Christian Radio yiyemerera ko idafite umukozi ushinzwe gukurikirana ibiganiro ikaba ifite icyuho mu mikorere yayo;

[33] Komite Ndangamyitwarire ishingiye ku masezerano y'imikoranire hagati y'Urwego rw'Abanyamakuru Bigenzura (RMC) n'Ikigo cy'Ighugu gishinzwe kugenzura imirimo ifitiye igihugu akamaro (RURA) yo kuwa 12 Nzeri 2013, mu ngingo ya 4 igika cya 6 n'gingo ya 5 igika cya 4 isabye ko Ikigo cy'Ighugu gishinzwe kugenzura imirimo ifitiye igihugu akamaro (RURA) kiba gihagaritse by'agateganyo uburenganzira bwo gukorera mu Rwanda (License) bwa Amazing Grace Cristian Radio 105.1 FM, mu gihe cy'amezi atatu (3) kugira ngo ibe inakemura ibibazo mu mikorere yayo;

[34] Komite Ndangamyitwarire ya RMC ishingiye ku makosa yagaragaye, irasaba ibitangazamakuru byose bikoresha amajwi n'ibikoresha amajwi n'amashusho kugira abakozi bashinzwe kugenzura ibitambutswa mu biganiro hagamije kubungabunga inyungu rusange za rubanda;

[35] Ni uko byemejwe mu ruhame none kuwa 12 Gashyatare 2018 ;

[36] **Icyitonderwa :** Komite Ndangamyitwarire imaze gusuzuma ikindi kirego cyatanzwe n'Ishyirahamwe ry'Abagore bakora Itangazamakauru mu Rwanda ARFEM rirega radio Amazing Grace Christian Radio igasanga impunge zatanzwe n'ibiregerwa bihuye n'ibyo Pro-Femmes Twese Hamwe yaregeye, yemeje ko imyanzuro ifashwe ireba impande zombi kuko isubiza impungenge impande zombi zirega zagize.

- [37] Komite Ndangamyitwarire igizwe na :

1. Komiseri Pst Jean-Pierre UWIMANA

2. Komiseri Edmund KAGIRE (Perezida)

3. Komiseri Liliane UWINEZA

